



Tir Yimyim

www.tirymyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tirymyim@gmail.com

TAPAK 3

Yangia anidakangma :

Tir Yimyim

tirymyim@aolima

tir yimyim

TAPAK 8

**TTAADC elections nung Congress-i
tongtibang shilem agitsü: Pijush**

**Longkak aitba ken o nung
Jimmy Lai aitsüogo**

VOL. XVIII NO. 168 (ADOK 168) DIMAPUR

ROGONÜ (FRIDAY)

RONGCHII (APRIL) 02, 2021

₹ 5.00

Angh Ravi-i Good Friday salem lemsatep

Dimapur, Rongchii/April 1 (TYO): Nagaland Angh R.N. Ravi-i sangdong ka ajanga Nagaland nung aliba nüburtem den Good Friday salem lemsatepogo.

Good Friday ya temenen madak takok anguba temaitsü lir. Ochi, azütokshi nungi pilaa aliba, temeim, tai adokba aser taochi ya Yisu Khrista jakla lir. Asenoki item tongtibang yimyatem ya shisadanga angazükti aser talisa lanurtemi Pa yimya tajungtem angazüka benshitsüla, ta Angh-i ashi.

Khrista ya tetsür aser tebur ajak nem yimjung bener arutsütsü atema iba limai aru. Pa yimjung chuba lir. Meimchirtem yimjung aser tesunep nung lidaktsütsü atema pa kangkitong nung asü. Yisu-i ochiba meimer aser lai o

nung "nai ochi metettsü aser ochi jagi na nüchi kümdaktsütsü," aser ano "yimjung yanglurtemi mao kechiyong parnok dang Tsüngrem chirtem ta ajatsü," ta shi lir. Azütokshiba nungi pilaa yimjung aser ochiba bener arutsüba ya Yisu-i meimchirtem nem agütsüba sempet tulutiba lir, ta paisa ashi.

Iba anogo amungba mapang nisung ajaki mapang ajak nung Covid-19 inyakyim sülen tashi angaa anidaktsü ni mepeshir, ta paisa shisem.

Good Friday tanüla asenok tebilemdangba aser inyaksangshi nung lidakjang. Nenok ajak den Good Friday salem lemsateper. Tzüngremi Nagaland Moajang, ta Angh R.N. Ravi-i kasa sangdong ajanga lemsatep.

Nagaland nung nisung tasen pongu dak COVID-19 putet

Kohima, Rongchii/April 01 (TYO): Brehostibarnü nisung tasen pongu dak COVID-19 putetba ajanga Nagaland nung iba tashidak agi meneper ajak senteper 12,345 kumogo.

"Tanü COVID-19 positive cases pongu liasü, Kohima nung ka aser Dimapur nung pezü," ta Director, Health & Family Welfare Department, Dr. Denis Hangsing ajanga anogoshi sangdongba COVID-19 bulletin nung ashi.

State nung iba virus nungi taneptsü angur nisung 11,980 lir, aser Bodhbarnü taneptsü anguba ya shilem 97.07 liasü saka Brehostibarnü tajemba kuma shilem 97.04 kumogo, aser tang active

patient nisung 116 lir, ta pai ashi.

State nung tang tashinung danga tashidak densema shiranger nisung 10 dena ajak agi nisung 91 süogo aser iba tashidak agi shiranger nisung 158 danga state temi ogo, ta pai ashi.

Tang active cases alir ya nisung ka daka iba tashidak agi temang nung timtem agütsüba mali, ta pai ashi.

Nagaland nung COVID-19 tashidak alitsü südi ta temolung melemeteti sample 1,36,586 tendangogo aser item rongnung RT-PCR ajanga sample 75,480 tendang, TrueNat ajanga 37,537 aser Rapid Antigen Test ajanga 23,569 tendang, ta pai ashi.

Küm 45 tema nem Covid-19 vaccine agütsü tenzüko



Tanü Chief Secretary J.Alam aser pa kinungtsü na NHAH, Kohima nung Covid-19 vaccine agiba noksa nung angur. (Kohiam, April 1, 2021 DIPR)

Dimapur, Rongchii/April 1 (TYO): Arishi küm 45 aser temapurtem nem Covid-19 vaccine agütsüba sentong April 1 nü Naga Hospital Authority Kohima nung tenzüko.

Chief Secretary J.Alam aser pa kinungtsü densema sorkar tenzüker tejentem vaccine agizüker mezünpur rongnung densema liasü. Kasa mapang nung Kohima nung alirtem aika vaccine agitsü aruogo.

Kohima nung vaccine

agütsüdak tesem ana lir; ka Naga Hospital Kohima aser ka Urban Health Center, Seikhezou nung amenoka lir. Iba tesem ana nung Hombarnü nungi Brehostibarnü tashi anepdang 9:30 nungi nikongtsütsü 3:30 ako tashi vaccine agütsütsü. Vaccine ya April 15, 2021 nü tashi agütsütsü. Vaccine agiba mapang SOPs aser mapang shidak benoka inyaksangshitsü, ta ketdangser sangdong ka ajanga metetdaksü.

Rev. Dr. Mar Pongener-i Rev. Dr. Mar Atsongchanger ket nungi ES mapa agizükogo



Rev. Dr. Mar Pongener-i Rev. Dr. Mar Atsongchanger (tiyong) ket nungi ABAM Executive Secretary mapa agizükba mapang tangokba noksa nung angur. Tena den ABAM tir - Dr. Lolen Imchen densema angur. Mokokchung, April 1, 2021

Mokokchung, April 1 (TYO): Ao Baptist Arogo Mungdang (ABAM) Executive Secretary, Rev. Dr. Mar Atsongchanger den tepila aser Rev. Dr. Mar Pongener ABAM Executive Secretary mapa agizükba sentong ka April 1, 2021 nü Centenary Hall, Impur nung kaogo.

Sentong nung Rev. Dr. Mar Atsongchangeri salem o tatsüka

ashidang, pa küm 10 tashi ES ka ama inyakdang pa temeim kinungtsü den chirnurtem, pa den külemi inyaker secretaries aser staff-tem, Mokokchung Baptist Arogo, kinunger aser anükabangtem aser arogo balala nungi pastor-tem, itemji pa atema tongshi tulutiba liasü, anungji, parnok ajak dang pelaba metetdaksü.

HSSLC & HSLC tatidang April 6 & 7 nungi tenzüker

Dimapur, Rongchii/April 1 (TYO): HSSLC tatidang 2021 April 6, 2021 nü nungi April 29 tashi agitsü aser HSLC tatidang April 7 nü nungi 21 nü tashi agitsü renemer aliba NBSE-i sangdongogo.

HSSLC tatidang atema kaketshir 6835 (Arts - 13024, Commerce - 1347 aser Science - 2464) züngoksema lir, aser parnok tatidang agütsüba tesem 96 nung tatidang agütsütsü. Kaketshir 16835 rongnungi tetsür 8641 aser tebur 8194 lir.

2021 Class XI Promotion tatidang March 31 nü tembangogo kong kaketshir 17343-i tatidang agüja liasü.

Kasa mapang nung kaketshir 23612-i provisional examination centre 133 aser sub centre 4 nung 2021 HSLC tatidang agütsütsü. Kaketshir 742, tatidang agütsüba tesem 41 nung 2021 HSLC Compartmental tatidang agütsütsü.

Temetettsükaji COVID-19 wara pokteter aliba ajanga tatidang agütsüba tesem nung tetsünga ita inyaksangshitsü

atema district aser sub division tem nung tatidang agütsüba tesem talila bendenloktsüogo.

March 17 nü Board-i ayongzüka Centre Superintendent tem den online senden ka menogo, kong parnok mapa aser khuretem tatongi sensaksemogo. Maneni COVID-19 tashidak prokshia aoba nokdangtsü atema tatidang agiba mapang jenjang agitsübatem indang parnok nem metetdaksüogo.

Board-i, tatidang agütsüba tesemtem nung takdang, metsümeshidak aser hall tem merektsü atema osettsüt agütsüogo.

Kasa mapang nung tatidang agütsütsüpurtem dang telangzüba magütsü tsünga tasüngdangbatem kanga junga azüngtsü metetdaksüogo. Marks agütsüba temulungdang yur telangzüba agütsütsü kanga tongtibang. Kaketshirtem pen, pencil, scale, eraser, sharpener aser geometry instruments amala tenüngdakba osettem dang bener arudaktsütsü. Maneni pocket hand sanitizer, mask, transparent

Impur lima inyaka arudang tangazükba jenti nguogo, aji oda, meimchir dang asünung maparen balala inyakdang aibelen kar danga inyaksema lira, "tatok agüjangma" ta pai mepishia ashi. Pa melena ES tasen shiba arur, pa lenisüba kübok ABAM taoba mapang dangnungi tajungba aotsü imlar, ta paisa moatsü.

Rev. Dr. Mar Atsongchanger aser par kibongi Indonesia lima Riau Island (SIM) kübok Batam City nung missionary ka ama or tenzütsü. Pa university ka nung tesayur mapa inyaktsü aser pa temeim kinungtsü (Wt. Amenla Mar)-a university nungji mentor mapa inyaktsü, ta angazüker.

Rev. Dr. Mar Pongeneria mapa agizükba olen tatsüka lemsatepdang, maongka tulu anguba asoshi pelaba den mapa ajak Tsüngrem dak rangloker inyaktsü merangtsü, anungji, nüburtem nungi shisatsü den sarasadem agi yaridaktsünür, ta mepishia metetdaksü.

(Maneni tapak 2 nung...)

Nagaland BJP MLA temi NEDA Convenor den ajuruteper

Dimapur, April 01(TYO): March 30, 2021 nü Dy. CM aser BLPleader Y. Patton-i anir Nagaland BJP MLA temi Guwahati nung Assam Minister aser NEDA Convenor Himanta Biswa Sarma den ajuruteper.

Iba teshimtet telok nung Y Patton den Minister Kashiho Sangtam, Advisor Dr. Longrineken, Advisor Kazheto Kinimi aser Advisor H. Haying nungertem dena liasü, ta Media Cell Dy. CMO-i sangdong ka nung metetdaksü. Parnoki state anaprong dak

sendakba tebilemtsü onüktem lemsatep aser Prime Minister Narendra Modi mangdang kübok BJP-i North East India tejakleni aotsü aser renloktsü onüktem jemb.

Assam nunger tesüiba küm 5 BJP nem sorkar ketdangtsütsü maongka agütsüba atema Nagaland BJP MLA temi pelaba metetdaksü.

Chief Minister Sarbananda Sonowal aser pa den yariteper Minister & NEDA Convenor

Himanta Biswa Sarma nati Assam kanga renlokdaaktsüba atema parnokisa tenünsang agütsü.

Nagaland BJP MLA temisa Assam nung tang tagidak Assembly election nung BJP-i takok tulu angutsü imlar, ta parnokisa ashi.

NEDA Convenor Sarma-i Nagaland MLA tem dang pelaba metetdaksü aser parnoki semdangba ya Northeast nung party longjema aser tashi ita aliba sayur ta ashi.

GOOD FRIDAY SODI

Alima meimchirtem temenen nungi kümzüksü asoshi Yisu Khrista asüba anogo bilemteta amongba 'Good Friday' anogo nung sarasadema amongtsü asoshi Tir Yimyim office tanü April 2, 2021 nü shibanger, anungji April 03, 2021 Tir Yimyim adok malitsü.

- Ketdangser, Tir Yimyim.

Doctor tem küm superannuation ken o jangjashitsü

Dimapur, Rongchii/April 1 (TYO): March 31 nü osang kaket balala nung doctor tem küm superannuation dak sendakba nung NIDA-i asendenshir longkak aitsü amokmerena sangdongba sorkari jangjaogo.

Iba dak sendakba nung ken o jangjashija, Cabinet-i 14.01.2021 nü iba ken o asadang aser mezüngbuba Cabinet Sub-Committee-i NSF den sensak asemstü atema telemtetba agi. Iba sülen Cabinet Sub-Committee-i, NSF aser tanga stakeholder tem den sensak semogo aser ken o ya tang Cabinet jenjang nung sorkari maneni asadangdar.

2020-21 financial year nung COVID wara pokteter aliba ajanga sorkari sen intokba azüoktsü asoshi jenjang tesashi kar agitsüsa aküm, kong mapai nisung tasen maniokba densema lir.

Kasa mapang nung NIDA ketdangpurtem nem osang

tejangja agütsüogo aser telemtetba tajung ka agitsü atema sensaksem maneni akatsü atema nüngdakba Chief Minister, Minister for Health & Family Welfare, Chief Secretary Nagaland aser Principal Secretary Health & Family Welfare-i NIDA ketdangsürtem den senden amenba mapang lemsatepogo.

Ajisüaka tesasatsüka NIDA-i ken o benokba manga aser longkak aitba agintsü asoshi akhangba magizük.

Temetettsükaji sorkari doctor tem mapa jenajang ajungkettsü atema jenjang aika agiogo, kong 2019 küm Director (Dental) ka shimba, 2020 küm category balala nung (Director (ME&RS:1; ZLO: 5, DVBO: 8; Specialist: 68; MO: 44; Dental Surgeon: 3 & AYUSH MO: 11) doctor mapa 134 agütsüba, Mapa nung senior ketdangsürtem temaba jenjangi atutsü atema temsüa

kümdaktsütsü asoshi grade tema nung alirtem tenure ajemshija eligibility criteria yanglushitsüba, Medical College ana amenoktsü temelaba agütsüba aser state nung health infrastructure terenlok asoshi jenjang balala agiba densema lir.

Health infrastructure ajungkettsü aser sorkar kübok medical professional tem mapa jenjang ajungkettsütsü atema sorkar bendanga agütsür lir. Ajisüaka sorkari sensaksem ajanga iba ken o lenla ajak nungi asadangtsü nüngdaker aser kasa mapang nung state nung inyakyim dak ajemdaker temzüng ozüng aser ketdangsüba temulungdang ayutsü nüngdaker.

Ken o tang sensak tesemdak aser Cabinet-i asadangtsü ta NIDA jangjaa lir asünung nüburtem nem iba osang magütsütsü asü aser longkak aitba agintsüla, kechiyong iba ajanga ken o mebentettsü.

4buba Sakhi One stop centre Wokha senden menogo

Dimapur, Rongchii/April 1 (TYO): 4buba Sakhi One stop centre Wokha senden DC conference hall, Wokha nung March 31 nü district level management committee den menogo.

Senden nung SDO (C), Wokha, Chonpenthung Ezung-i, timtem agi kongshir aliba tetsürtem nem teyari balala agütsüba indang metetdaksü aser Sakhi One Stop Centre Wokha kübok convergence department tem anidaktsüba guideline metetdaksü. Paisa, convergence sentong tali agitsü atema tongtibannga inyaktsü asoshi Sakhi OSC team

ajungshi. Maneni pai convergence Department ajak aser talisa Medical department, Child Welfare Committee aser Social welfare department dang Sakhi-OSC tongtibannga nungittsü mepeshi.

Kasa mapang nung Mhathung Kikon IT OSC-i, OSC-i ayimjema inyakba innovation aser outreach sentongtem indang presentation ka agütsü. Paisa, awareness sentong agibattem indang aser OSC amenokba sülen ken o agizükbatem indang metetdaksü.

Sensaksem mapang centre anep anepa inyaksangshitsü

atema department balalai parnok tebilemba lemsatep. Department temi shidangbatema agizüka, centre-i takokba tashi metongjemi aliba nüburtem tonga aotsü merangtsü nangzük.

Wokha BAR Association tir Senior Adv. Oren, Lotha Eloehoho nungi lenirtem, Women Cell-Police Station-Wokha, Wokha District Legal Service aser District Welfare Committee nungi züngsemtemi iba senden nung shilem agi.

Iba senden ya Case Worker Sakhi One stop Centre Wokha Thungbeni kikon lenisüba kübok agia liasü.

Rev. Dr. Mar Pongener-i Rev. Dr. Mar Atsongchanger ... (TAPAK 1 NUNGI...)

Rev. Dr. Mar Pongener ya Longjang nunger Wb. Yarmong'er jabaso lir. Pa kinungtsü – Sentila Jamir aser tena nem jala 1 aser jabaso 2 moaja lir. Pa CTC Aolijen nungi B. Th. renem, ETC Jorhat nungi B.D azüng, UTC Bangalore nungi M. Th renem, Trinity Theological College, Singapore nungi D. Th degree renem, 2011 küm ordain asü aser 2019 küm professorship CTC nungi angu. 1988-1989 Tuli Town Baptist Arogo nung Youth Director inyak aser 1991 nungi CTC

nung tesayur mapa aser Dean of PostGraduate Studies, Academic Dean aser tangji Principal teinyakdak lir. Pa ya ABAM nunga tir inyakogo aser lokti balala nung amdaka aser shilem agia aruba takutet nübu ka lir. Pa ya ABAM Executive Secretary 7 buba asütsü.

Tanü sentong nung tayongzükba o jembir taoba ABAM Executive Secretary, Rev. L. Kari Longchar-i tanü arogotemi inyaktsüba wadang kar bener arua lemsatep. ABAM Vice President – Rev. Sentsashi,

Ao Pastors Fellowship nungi – Rev. L Meren Kichu, Ao Theological Association tir – T. Lima, Mokokchung Baptist Arogo Pastor – Rev. Sobu Pongen, Rev. L. Yapang Mollier, Alemla Mozür, Rev. R. Teka Pastor parnokia sentong nung shilem balala agia liasü. ABAM tir – Dr. Lolen Imchen ajanga ABAM ES mapa melentepba ketdang süa liasü. Impur Bible School aser CTC choir-i salem ken aser moatsüba ken tena tesentepertem tanela nung ajungmeso.



Social Welfare Department Mon ajanga March 31, 2021 nü DRDA Conference Hall, Mon nung Poshan Pakhwada shibangba sentong ka agia liasü. Sentong nung tajungshi o jembiba mapang Deputy Commissioner, Mon, Thavaseelan K, IAS aser Project Director, DRDA Mon, Temjen Longchar nungeri anganwadi worker ajak dang mapa tajung maneni inyaktsü ayongzüka liasü.

Dimapur DPDB senden April 5 nü amentsü

Dimapur, Rongchii/April 01 (TYO): Deputy Commissioner Dimapur, Rajesh Soundararajan ajanga sangdong ka nung, ita shia amenba Dimapur District Planning & Development Board senden April ita atema April 5, 2021 anüngdang 11:00

ako nungi tenzüka Deputy Commissioner, Dimapur indang Conference Hall nung amentsü, ta metetdaksü.

Iba dak sendakba nung Dimapur DPDB züngsem ajunga senden nung medema arua adentsü mepishir, ta sangdong ajangasa ashi.

Zunheboto nung IHIP training asemnü agi

Dimapur, Rongchii/April 01 (TYO): Chief Medical Officer Office, Zunheboto ajanga Town Hall, Zunheboto nung March 25, 30 aser 31, 2021 anogotem nung Integrated Health Information Platform (IHIP) training ayongzüka agia liasü.

IHIP ya web based near real-time information system ka lir, koba ajanga tashidak poktetba ketdangsüba aser iba dak sendakba inyakyim asoshi noksa tem dena tang teinyakdak geospatial osangtem agütsür.

IHIP nung tongtipang features temji mobile application amshia real time data reporting agütsüba: yimtsüing, state aser central level nung amshitetba, osang agütsüba health facility tem geo-tag asüba dena lir.

Tanen makai tajungba nung shirangertem anepalutsü, health data/record temai madokdaksüi ketdangsütsü, tashidak tali tajungba nung jangjatettsü, shirangertemi mozüki semdangba tajemba kumdaaktsütsü, medical nung aibelen nungi kumzüktsü nükjidong nung iba training ya agüja liasü.

Iba training nung shisalen sayurtemji Dr. Zhekheli Chishi, District Epidemiologist, Data Manager (IDSP) DPM aser BPM's tem liasü.

Iba sentong nung Dr. Nukshisangla, DPO (RCH & UIP) ajanga tarurtem pela agizükba o jembia liasü. Training agirtem ya MO, CHO, GNM, ANM, Pharmacist aser LDA tem liasü.

Security Forces temi Kiphire nung prangpong ayoker ka apu



Dimapur, Rongchii/April 01 (TYO): Security Forces aser Police lungjemer March 30, 2021 nü operation ka agiba mapang general area Sampurre Junction, Kiphire district nung ozüing alema prangpong ayoker ka pua liasü.

Osang tejangja kar nung ajemdaker Security Forces aser Police temi mita aoba mapang

Sampurre Junction, Kiphire district nung iba nisungba ket nungi point 22mm pistol ka den magazine, point 22mm indang injang ter aser Ecco Van ka nguteta liasü.

Iba ken o maneni asüngdangyatsü atema pua alisang den pa ket nungi ngutetba oset ajak Kiphire Police Station, Kiphire nem agütsüogo, ta sangdong ka ajanga ashi.

NSCN/GPRN (R)-i benjung salem lemsatep

Dimapur, Rongchii/April 1 (TYO): NSCN/GPRN (Reformation)-i, 'Konyak, Phom aser Chang' Naga nunger den 'Aoleang Mongyu (Konyak) Phom Monyu (Phom) aser Kundaglung (Chang)' benjung salem lemsatepogo, koba April 1-3 tashi amunger.

'Aoleang Mongyu' ya Konyak nunger benjung tongtiban ka lir. Iba benjung ya metsütsüngküm mongpu benjung ka lir, koba Aoleang lee (April) mezüngbuba hopta nung amunger. Iba benjung ya küm tejenba tembangba temaittsü aser metsütsüngküm tenzüka den küm tasen agizükba benjung ka lir. Aoleang benjung amungba mapang Konyak nungertemi temoatsü küm ka asütsü sarasadema amunger.

'Phom Monyu' benjung ya Phom nungertemi küm taseni aiba benjungtsü atema ayongzüka amunger. Benjung

mapang "Lan Nyangshem" ta nüngja agütsür süngkong ajena benjunger. Monyu benjung mapang teburtemi, kibong kümer aliba pei jala aser teyi tenu nungertem nem chiyongtsü aser yi renemja aküm tetushi agütsür. Iba sobaliba ajanga Phom nungertemi tetsürtem akhümtsüba sayur.

Kasa mapang nung tongtiban ka lir. Iba benjung ya 'Kundaglung' ya Chang nungertemi temaotsü meshia amungba benjung ka lir.

Konyak, Phom aser Chang nungertem ya Naga nunger rongnung nokinketer kintem lir, aser parnok tasü aitba ajanga ajaki jangja lir. Konyak, Phom aser Chang nungertem benjung amungba mapang kati ka taoba ta züngshitepba maneni lidakjang aser Naga nunger rongnung yimjung aser telongjem bener arutsü kümang, ta NSCN/GPRN (Reformation) MIP sangdong ka ajanga metetdaksü.



April 01, 2021: Assam nung election tasembuba shilem metenzük tsüngda Congress-i aniba 'Mahajot' alliance nem teyari agütsütsü atema party general secretary Priyanka Gandhi Vadra-i, Hokolbarnü Assam semdangtsü. Priyanka-i, Lower Assam nung lokti senden asem nung shilem agitsü.

TTAADCElections nung Congress-i tongtibang shilem agitsü: Pijush

Agartala, Rongchii/April 1 (Agencies): Tripura Pradesh Congress tir Pijush Kanti Biswas-i, taruba Tripura Tribal Areas Autonomous District Council (TTAADC) nung par party-i 'kingmaker' shilem agitsü ta amanger.

"Council tentetba nung Congress party-i tongtibang shilem agitsü renema lir, kechiyong Left Front aser BJP-IPFT sorkar dak temulung masüba sülen nüburttem aikati onok candidate tem pusem tenzükogo," ta Biswas-i EastMojo dang ashi.

Paisa, BJP-IPFT alliance mesera CPIM aser TIPRA-i absolute majority mangutsü, ta ashi.

District council nung menden 30 lir aser item rongnung menden 28 nüburttemi shimmer aser ana Tripura Angh-i shimmer. Iba tesem yagi state litsü 68 ayimjemer aser state nütsünyongsük asem nung ka dak tema iba tesem nung alir.

"District council nung BJP

yongtsü nung aser alliance partner IPFT den mangatetep adoker aliba ajanga Congress nem teyari agütsüogo. Tenem nung aliba tesemtem nung alirtemi onok pusem tenzükogo aser menden 10 dak tema koktettsü temulung lema bilemer," ta Biswa-i ashi.

Election nung Congress party kija toktepaka parnoki election tembangba sülen tanga party den longjemtsü akok.

Biswas-i ashiba agi, IPFT-i state elections mapang Tipraland nangzükogo, saka state assembly nung khien danga ola adoka mejembi.

"IPFT-i election mapang Tipraland asoshi ayongzuka nüburttem ashioksüogo. Tang nüburttemi aibelen angatetogo aser parnok nem vote agüja tanaben aibelen masütsü," ta Biswas-i ashi.

Paisa, taoba state Congress tir aser TIPRA mendenbuba Pradyot Kishore Deb Barman-i, Greater Tipraland tenüng nung lisopur den asayaba

aitsüogo. Iba amala tasa ya talangkabo maotsü, ta pai ashi.

"TIPRA mendenbubai pa Congress nung aliba mapang Tripura nung Citizenship Amendment Act (CAA) aser National Register of Citizens indang jembiogo, saka tangbo pa nungi kecha mangashir. Paisa, BJP-IPFT teloktep sorkar indanga mejembir aser CPIM-i pa indang nüboyimba sentong nung aibelenba indang mejembir, iba ajanga pa onük mejangjai kümogo," ta Biswas-i ashi.

Congress-i, electric sentsü agitsü, mapa mongui aliba lanurtem nem social pension agütsütsü, ki shia nem tajemtsü agütsütsü aser district council nung lisopurtem atema university ka amenoktsütsü nangzükogo.

Congress-isa, Tripura in-charge Kuljit Singh Nagra, Mahila Congress tir Sushmita Dev, aser Youth Congress tir Srinivas BV nung amala national lenirtem nüboyimba sentong asoshi yoktsü.

EC-i Himanta nem show-cause notice agütsü

Guwahati, Rongchii/April 1 (Agencies): Election Commission (EC)-i Brehostibarnü Assam finance minister aser BJP lenir Himanta Biswa Sarma nem show-cause notice ka agütsüogo. Pai Bodoland People's Front (BPF) tir Hagrama Mohilary amokmerenba atema show-cause notice agüja liasü.

Congress-i ken o benokba

dak ajemdaker North East Democratic Alliance (NEDA) convenor Himanta Biswa Sarma nem show-cause notice agütsüogo.

Bodoland People's Front (BPF) ya Congress-i aniba Grand Alliance kübok party rongnung ka lir

BPF-i, Assam Assembly election 2021 nung tokteptsü atema BJP toktsür Grand Alliance nung aden.

Assam finance minister Sarma-i, taoba Bodoland Territorial Council (BTC) chief executive member (CEM) Hagrama Mohilary, National Investigation Agency (NIA) teyari nung tepuokdaki yoktsü ta amokmerena liasü.

Election Commission (EC)-i minister Sarma dang April 2 nü nikongtsütsü 5 ako tashi nungbo telangzüba agütsütsü tuyuogo.

AJP tir Lurinjyoti Gogoi tetsü süogo

Tinsukia, Rongchii/April 1 (Agencies): Assam Jatiya Parishad tir Lurinjyoti Gogoi tetsü Dulu Gogoi, Bodhbar aonung Dibrugarh nung nija mozüki ka nung süogo.

Dulu ya Hombar anepdang stroke asü aser Sivasagar nung lar kidang nungi Sanjeevani Hospital, Dibrugarh-i anir aru. La ventilator support agidakja liasü aser Bodhbar aonung 10:45 nung asü, ta osang balala ajanga metetdaksü.

Assam Chief Minister Sarbananda Sonowal-i Twitter ajanga Bodhbar aonung 23:55 ako nung asükho lemsatepogo. "Shri @lurinjtogogoi tetsü Dulu Gogoi asüba osang angazüka temulung koremer. Mangyim jashi mapang Lurinjyoti aser par kinungertem den asükho

lemsateper aser asür tanüla yimjung nung anisüngzüksü atema sarasademtsür. Om Shanti," ta pai tweet asü.

Brehostiba anepdang la den asüpilasentong Lurinjyoti Gogoi-i anir agiogo. "AASU general secretary Shankarjyoti Baruah aser tanga züngsemtem asüpila sentong nung dena liasü," ta source ajangasa metetdaksü.

AJP ya tawa tentetba regional political party ka lir, koba Assam ajunga anokshia CAA anema longkak aitiba nungi poktetba lir, aser parnok tang mezüngbuba assembly election nung toktepdar.

Party tir Gogoi-a Assam Assembly elections nung Duliajan LAC aser Naharkatia LAC nungi toktepdar, kong March 27 nü vote agütsüogo.



April 01, 2021: 23 Sector Assam Rifles Aizawl Battalion-i, Aizwal nung prangbong injang ngutetogo. Aizwal nung prangbong injang meima aliba osang tejangja angazükba sülen Mizoram police aser Assam Rifles na senteper Bodhbarnü meita aoba mapang prangbong injangtem nguteta liasü.

Assam elections: Rangia nung Pakistan wako ka angu; Congress-i BJP aitsü

Guwahati, Rongchii/April 1 (Agencies): Gorkuchi kübok Rangia tesem nung alirtemi lenmang tezülen Pakistan wako ka songa aliba anguba sülen iba wako rongtoktsüogo.

Rangiya constituency nung Brehostibarnü election agia liasü.

BJP nungi Babhesh Kalita, Assam Jatiya Parishad (AJP) nungi Babul Sahariah, Communist Party of India (Marxist) nungi Dev Misra aser independent candidate pezü iba constituency nungi toktepdar.

Gorkuchi ya Rangia junction nung meter 400 shi dang pilar lir.

Wako songtsüba shingaia nangzuka mali saka political party balalai BJP dak tai tongloktsüogo aser ashiba agi, iba inyakyim ya parnoki Assam nung tang election agia aliba ken

o tongtibangba nungi nüburttem anisatsü atema merangdangba maparen ka lir.

Assam Pradesh Congress Committee (APCC)-i iba tatalokba aitsüogo aser iba amala maparen benoka inyakba atema saffron party aitsüogo.

"Iba ya BJP maparen lir.

Rangiy constitution nung Congress-i aniba grand alliance-i takok angutsü ta parnoki meteta lir," ta Congress lenir kati ashi.

"Iba amala inyakyim benoka parnoki Mahajot noksa raksatsütsü meranger," ta pai ashi.

Kasa mapang nung BJP lenirtemi, Iba inyakyim ya Assam Assembly elections nung par party akoksadaksütsü atema inyaksangshiba nisungtemi inyakba maparen ka lir, ta shiogo.



April 01, 2021: Assam kübok Morigaon district nung election tanabuba shilem agiba mapang nüburttem vote agütsütsü atema tarensena nokdakba noksa nung angur.



TIR YIMYIM YIMOBILEM (EDITORIAL)

DIMAPUR ROGONÜ, RONGCHII (APRIL) 02, 2021

AJI NI ASÜ, KIBUBA ?

Asen kümtetdakba Yisu Khrista asenok meimchirtem menen asoshi kangki nung angenloksü mapang anasa atalokbatem rongnung temenungratsü aser temulung ashitsü tatalokbatem rongnung kaji, Pa nütsüngtem den tangar ka kidang temaba takdang nung kümtettsü benjong chiyongba mapangji liasü. Iba aonung ya Yisui mapang tatsüka lir külen parnok dak ataloktsüba indang Par nütsüngtem dang indangindanga ashiba o tasak ana Mathi 26, Mark 14, Luke 22 nung shia angur. Kaji, taonung “ nenok rongnung kati ni ashioktsütsü,” aser ano kaji, “taonung nenok ajak kü dak metsüdaktsü.” Iba aonung Yisui Pa nütsüngtem den chiyongdang ashiba o tulu ana ya, tanü asenok taküm aser asen tamang den medemdanga angatettsü merangtsüba kanga tongtibang lir. Iba mapang yabo Yisu nütsüng terana dang liasü saka tanübo asenok ajak ya Yisu nütsüng lir. Aji oda, Yisui tanüa asenok dang nenok rongnung memenui kari ni ashioktsütsü ta ashika asünunga, asenokia komaka bilemla aser langzüla ta bilemer. Yisui Pa nütsüng ter ana dang kasa o ya ashidang, parnok ajaki “ Kibuba, aji ni asü ?” ta asüngdangtsü tenzük. Nütsüngtem telangzüba ya azüngdang, kechiba parnok rongnung shingaia nebo na mashioktsütsü, ta meshitet ta bilemer. Atangji, nütsüngtem küm asem tashi Yisu den külemi tensa tajung tamajung tia ajak nung jajaa arur, iba kümtettsü benjong chiyongba aonung ya tesüsaba tatidang (final exam) agiba mapang amato ka liasü. Idangji, Yisui parnok dang nenok ajak iba tatidang nung tamakok angutsü ta ashiba amato ka lir. Nenok ajak tatidang nung tamakok angutsü ta tesayuri ashidang, kaketshirtem rongnung katia, tesayur, nebo akoktsü ta meshitetba tetezüji, parnok shinga renema mali asü. Kibubai nütsüngtem dang nenok ajaki ta masü saka nenok rongnung kati ni ashioktsütsü ta ashidang, nebo na kodanga mashioktsütsü ta meshitetba tamang jagi tangari Yisu pua bener aodanga menokdaktet. Iba tamang jagi Yisu tangar ket nung züka merenshidang, hau ni Par nütsünga ta meshitet. Atangji, Yisui nütsüngtem dang taonung nenok ajak kü dak metsüdaktsü ta ashidang, Peter- iang nebo kodanga memetsüdaktsü ta ashiba angur saka metsütsüi Yisui ashiba ama metsüdak aser pai pasasa pa Yisu nütsünga ta kilitsür tsüngdanga menangzüktet. Yisu nütsüngtem Pa sülen sayatenya mapatem inyakba ajak ajangshia jajaa arur, Yisu pua kangshiba mapangbo Yisu nütsünga ta ka mesünüi akümba amato, tanü asenok küm papiga ya amanga arur Yisu yimsü anemba telokang tesashiba aser telongsoba aküm dang, asenok ishika dang süaka asenoki asenoksasa Yisu nütsünga ta meshitettsüa lira, iba tangatetba jagibo Yisu ashioktsütsü. Aji oda, tanü Yisui asenok dang nenok tang anogo shia yamai kü den jajaaka, kodang election arudir, nenok ajak kü dak metsüdaktsü, kechiyong election mapangbo nenok asoshi niji mesadem temetsüdaktsü süng long ka agi nokdanga ayu ama asütsü ta shidar amato bilemdi. Aji oda, tangari Yisu mezüngmeshitsü tenzükdang, Peteri Yisuji pa kibur aser tesayur ta menangzüktetba ama, pen tera kirak nung aser tiyazü o ka jembi nung, kodang asen taküm nung senotsü tajangzük tuluka agutsüsa mapang ka asenoki ajurudir, asenoka Peter amaji Yisuji temeteta memetet amai kümadoker. Aji oda, kodang election arudir, ashiko, Yisu nütsüngi Pa sendokba amaji, arogo tenzükertema tenzükba mapa nungia anentsü, kechiyong Yisuji election mapang asenok asoshi temetsüdaktsü akümer. Iba ama alima yimten tashi raktepba aser rongsen bushiba tensa mapang ka nung, Yisui asenok dang nenok rongnung kati ni ashioktsütsü ta shira, asenokibo Kibuba, aji ni asü ? ta masü saka Kibuba, imlibilema aji nibo tesüdaktsüma, “ kü dang aochiang,” ta T.Ken 57 nung David-i Kibuba dang ashi ama aser Luke 18 nung Yeriko lenmang nung nükpoksangi Yisu dang ashi ama, kanga kukua sarasademtsüla. Yisui asenok tashimait, tamang tila aser terata tia ajak ya meteta lir, anungji Pai iba ama sarasademba mulungjangji aginür. Kangki nung auersang sarasademjia kasaji liasü. Tanüa asenoki Kibuba Yisu dang, auersangi sarasademba ama, ni auyaogo, ni ochimashi inyakogo, ni aibelenogo, anungji kü dang aochiang aser nü yimli arudang nia bilemtetangma ta shidi.

OLEMSABANG

Article on Good Friday Message -Topic- VIA DOLOROSA

~ Tiala Imchen, Dimapur.

Yisu Kangki taret bener jajaba Calvary lenmang dang ‘Via Dolorosa’ ajar. Via Dolorosa tetezü Latin oshi agi “way of suffering” timtemba lenmang. Asen Kibuba Yisu Khrista Kangki taret bener tekolak nung ai korang semtsür, lisü agi repa metsü metsülokja rishikangshia jajabaji Pilate Chubar kima nungi tenzüka Golgotha tenem tashi nungji Station 14 lir. Via Dolorosa Station 14 nungji tatalokba balalatem reprangdi ;-

Stations pungu (10-14) yabo Golgotha tenem kolak nung aliba Holy Sepulcher Church telung nung lir. Holyland-i aoertemi kanga junga meteta lir.

Via Dolorosa- Yisu Calvary lenmangji indang indanga aoba lenmang tesadem ka masü, saka tetsüng lenmang atang dang aser lenmangji mekümteti lendi lenmang balalai pungteter aser Golgotha tenemjibo kanga atang atur. Saka tanübo lenmangji kanga junga step menoker lir. Akhidang Jews nunger yimsü agi Criminals-temji nübur ajak tan südaktsütsü mechi yimjak nung maksüdakja merenshia yimdong süa anir jajadang, kinük kisang kishi lenmang temesü ajaklen meketa anir jaja.

Station 1:

Pilate Chubai Yisu bendanga agütsü
(Pilate Condemned Jesus to die)

Station 2:

Yang nungi Yisui Kangki apur jaja
(Jesus carries His cross)

Station 3:

Yisu Kangki apur jajadang mezüngbuba yangi alang
(Jesus Falls the first time)

Station 4:

Yangi Yisui tetsü Mary ajuru
(Jesus meets His mother Mary)

Station 5:

Simon-i Yisu Kangki khen melenzüka aben
(Simon of Cyrine helps carry the Cross.)

Station 6:

Tetsür chanu ka tenüng agi Veronica-i Yisu tejak nung asentsü aser azü la Romal agi aidoktsü.
(Veronica wipes the face of Jesus)

Station 7:

Yangi Yisu tanabenbuba alang.
(Jesus Falls the second time)

Station 8:

Yisui Jerusalem tetsürtem jeba PA sülen anidakba ngua parnok dang ashi, PA asoshi teheb saka nenok chirtem asoshi jebang.
(Jesus meets the women of Jerusalem told not to cry for Him but cry for their Children)

Station 9:

Yisu Kangki taret apur tasembenbuba yangi alang.
(Jesus Falls for the third time)

Station 10:

Yangi Yisu temang nung süoshi ajak agizüka indoktsü
(Jesus stripped of His clothes).

Station 11:

Ibai Golgotha tekolak ret kong Yisu Kangki nung meta
(Jesus Crucifixion- nailed to the Cross).

Station 12:

Yisu Kangki nung asü
(Jesus died on the Cross).

Station 13:

Yisu temang Kangki nungi agizük
(Jesus taken down from the Cross)

Station 14:

Yisu Leper nung arem
(Jesus buried in the tomb).

Iba tetezü tila tanurtemi ang süngla pei kidang nungi ngudaktsütsüba. Aser aji oda Jews nungertemi kecha TAI malisang Yisuji Criminals ka ama merenshiba angur.

Nia 2015 küm to October ita 23rd nü Via Dolorosa kong asen Kibuba Yisu Khrista kangki taret bener jaja iba lenmang nung jajadang tatembangbuba Station 14 (Golgotha tekolak ret) atongdangbo asentsü alua kanga bülemadok. Iba mapangji tsümtsür tantsür kabo len tom nung bülemba agi tangu mesashiteti khen süchia ao aser yakta dang Israel tour guide-i doctor dangi called asü aser minutes ishika tsüngda nung doctor arur anepalua nisung imdangi arudaktsü aser ano maneni Golgotha tenemi atuba tatalokba ni kodanga mamar. Iba mapang kü mulung nung yamai bilem, nibo tanü lenmang tajung nung kecha maben jajadanga asentsü sena yamai bülemer nung Yisubo kangki taret apur ai korang semtsür azü agi yimbanger jajadang koda okronger alitsü na! ta shi shia bilema Kibuba nem tenüngsang agütsü.

YISU RISHIKANGSHIDANG AMSHIBA OSET KAR ASADANGDI:-

1. *Thorn*: Yisu tekolak nung semtsüba Ai korangji 1+2 Inch liasü.
2. *Cross*: Yisui abenba kangkiji 110 pounds approximately 50 kg taret, aser Yisui kangki apur jajaba calvary lenmangji 5280 ft talang (He walked with cross).
3. *Nail*: Yisu teka nung angenba kojat tasazükji 3/8 inch long square shaft (1 cm) Across. Pa tetsüng nung angenba kojat-jibo 59 inch long square shaft.
4. *He Extremely hard to Breath*: Pa tangu sashitsü mokoki liasü.
5. *A huge Loss of Blood*: Azü jenti tokshi.



Teimeim Tamangertem,

Alima nung tanangtiba O-ji Yisu Khristai asenok asoshi Pa taküm bendanga agütsüba “ TEMEIM O” ya lir. Ano alima nung tatalokba otsü rongnung tongtibangtiba aser tulutibaji Yisu asen menen asoshi kangki nung meta asüba anogo Good Friday ya lir. Alima nung temeim shiti talangtibaji “The Longest Love Letter” tanga kakat masü asen ket nung aliba TEMESHI LAI ya lir. Iba kakat tongtibang nükjidongji Tsüngremi alima odang meim nung Pa chir ka dang aliba asen menen alangzüksü asoshi taküm tenla agütsü, shiri Pa dak amangdir mesamatsü saka teti taküm angutsü John 3;16. Süra, Tsüngremi na odang meimba “ Longest Love Letter” koba dang Temeshi Lai ajar, iba kakat ya naia anogoshia züngdar ma ? mesüra küm tesadang nunga khen dang azüngtsü mapang mangur?. Asenok tamanger shiai khen aroka shisadangtsü tanü mapang tajung lir.

Kangki nung tashi lir. Kangki timtem majangi shia aruba ain aser Sentsüwangshi mali. Iba Good Friday ajanga tamanger shiai Yisu Tekümtet tejangja metetba mapang südakjangma Amen. Tsüngremi iba Ocet azünger ajak moajangma.

“ Good Friday is not a day of Sadness, Cry.
But it is the day of VICTORY.
The Day of Salvation.
The Day of Fulfillment.
So, Thank Him & Wish your neighbours,
A HAPPY GOOD FRIDAY !
The Day of VICTORY” .

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir



Laos nung ketdangsertem dang pastor Sithon chioktsü akhanger



2018 küm September ita nung Laos kübok Savannakhet province nung Pastor Sithon Thippavong kiyimba sentong ka nung tangokba noksa nung angur.

April 01, 2021: Laos nung meimchir temeden atema inyaker telok kati Laos nung ketdangsertem dang Khristan pastor ka chiokang, ta takhangba agütsüogo.

Tekülem sentong ayongzüka agiba atema yaküm March 15 nü ketdangsertemi arrshi küm 34 pastor, Sithon Thippavong apuba sülen pa tepoukdak küm ka jungogo.

Savannaket province nung pai ketdangsertem dang nungi temelaba magii tekülem sentong ayonga agir, ta aija pa tepoukdak ayu.

Communist linük nung sorkari 2019 küm ozüing ka agizüka liasü; aser iba ozüingji ajanga linük nung sayutsüngitsü aser tekülem sentong agitsü atema Khristantem nem temelaba agütsür, ajisüaka provincial areas nung mapang shia ketdangsertemi iba ozüing alema inyaker, ta Laos nung Khristantem aser meimchir temeden atema inyaker bendangertemi metetdaksü.

Pastor, Sithon maneni pua ayuba ya meimchir temeden anema lir, anungji pa tangsa chioktsüla, ta Asia-Pacific

region of Human Rights Watch nung Deputy Director, Phil Robertson-i ashi.

"Lao ketdangsertemi Pastor Sithon chioktsüla aser pa apuba sülen tepoukdak ayuba atema pa dang tatok meshitsüla," ta tan hopta tetenzüklen Robertson-i Radio Free Asia's Lao Service nem metetdakja liasü.

"Tamangba yimsü balala amangertem temeden balala anema ketdangsertemi meinyaktsüla," ta pai ashi.

Laos nung nütsüing million 7 shi lir, aser iba nungjagi Khristan nütsüingbo shilem 2 shi dang lir. Iba linük nung tamangba yimsü ajak sadoka amangtsü atema temeden lir, ajisüaka provincial areas nung Khristantem maneni amokmerener aser reshikangshir. Laos nung nisung aikati Khristan yimsü ya anüdoklen nungi missionary temi bener aruba bendanger yimsü ka lir, ta ashir.

Pastor Sithon ya Kalum Vangkhea yimdak sayutsüingir ka lir, aser pa apuba sülen iba osangji alima tesem ajaklen prokshia liasü.

Tamasabo pa ita 6

tepuokdak ayutsü obendang agüja liasü aser par kibong züngsemtem nem pa mesemdangdaksü, aser ibaji meimchir temeden anema lir, ta Asia-Pacific region of Human Rights Watch nung Deputy Director-isa metetdaksü.

Tamalen linük balala nung aliba Khristan organizations-ia Laos ketdangsertem dang pastor chioktsü atema takhangba agüja liasü.

US nung aliba Vision Beyond Borders nungi Eric Blievernicht-ia, "Pa puoka ayurtemi pa dang mejungi benshiba atema onoki tebilemtsü akar. Onoki Pastor Thippavong atema sarasademjang ta mepishir aser Lao sorkar dang pa chioktsü aser tamangba yimsü ajak sadoka amangtsüsa senso temeden akhümtsübutsu mepishir," ta metetdakja liasü.

Osang angazükba agi, taruba hopta Pastor Sithon anema ken o maneni angadangtsü.

"Pa aitsütsü asü maitsütsüar nisung ajaki yongyaa atadar," ta Savannaket province kübok pastor aliba district nungi Khristan kati metetdaksü.

Covid ajanga Pakistan nung Khristantemi Easter junga memongtettsü

April 01, 2021: Pakistan nung coronavirus wara ano asentenshir tasembenbubaren prokba nokdangtsü atema sorkari tenokdangba balala benokdar, anungji linük nung Khristantemi Easter tekülem sentong magitettsü, ta International Christian Concern (ICC)-i metetdaksü.

Tang Pakistan nung coronavirus tashidak tasembenbubaren prokdar, anungji linük nung Khristan aikati Good Friday aser Easter tekülem sentongtem nung medentettsü.

Osangbener den jembidang Karachi nungi Kashif Anthony-i, "Yaküm onoki Easter aser Khristmas

memongteti liasü aser Kibuba benjung magiteti liasü," ta ashi.

Paisa, "Takümbo Easter anogo nung tekülem sentong nung dentettsü ta onoki bilema liasü, ajisüaka covid wara tasembenbubaren prokba atema sorkari tebilemtsü kanga akar. Tang wara prokba ya mezüngbuba aser tanabuba shilem na dang nungi tamajungba asütsü , ta osang angashir," ta metetdaksü.

Pakistan nung coronavirus agi teshirangdakpur timba-timba akümba nung ajemdaker sorkari nisung o nisung na tsüingda tepila alitsü densema tenokdangba balala benokdar. Khristantem atema

temeshi hopta tenzükba sülen Good Friday aser Easter atema Khristantem mazüingi renemba mapang nung sorkari item tenokdangba benoker.

Tesüiba kümtem nunga kiralongra aser reshikangshi ajanga Pakistan nung Khristantemi Easter junga memongteti liasü.

2015 küm Easter atongtsü mapang anasa kiralongrartemi bomb amshia Pakistan nung Lahore kübok Youhanabad kiyong nung Tenla ki ana maaka liasü. Iba sülen 2016 küm nunga Lahore nung aliba public Park ka nung Khristantem Easter benjung amongdang kiralongrartemi bomb amshia amak.

ANOGO ABEN TSÜNGREM DEN

Yisui takok nung tembanger ao

"Kechiyong shibai nenok dak mapa tajung tenzük, Pai Yisu Khrista anogo tashi ajisa abensatsütsü ta ni amanger" (Filipi 1:6)

Kechisarena ajak tatembang kati arur. Kaket shisatsü bushiba süshia, tejangrabatem, health aser tashi aser arishi. Ajak tatembang katibosa arur. Yisu Khrista-a Tebui tenyaba wadang ka atema iba limai aru (Yohan 6:38), aser tembanger takok nung ao. Pa sentsüwangshi nung ayipa aobaji tebui tenyaba takok nung tembanger aoba indang angateter. Kechiyong Yisu-ia ashi "pei mulungba inyaktsü asoshi masü, saka tenyabai mulungba inyaktsü" ta shia lir. Adangji Yisu Khrista tatembangji takok nung tembanga indang angazüker. Tsüngremi asenok ajak sentong kaka nung yanglu, aser pa mesükba nung yangluba taküm shia jagi iba nükjidong atalokja tembangtsü Kibuba dang pa sentong asüngdangtsü nüngdaker. Kechiyong koba mapa südir sang, ajak tatembang kati arutsü. Tenyar Paul-i Tsüngremer sentong tajungji tatembang kati takok nung bener arur ta meteta pai ashi, "shibai nenok dak mapa tajung tenzü, Pai Yisu Khrista anogo tashi ajisa abensatsütsü ta amanger." Asenoki tenzükba Tsüngremji tatembang aser alizüing dak ranglokba Tsüngrem ka lir. "Langka tetenzük dangbo iba tatembangji tajungba lir." (Sayutsüingir 7:8). Yisu-i takok nung tembanga ama asenok koba mapa südir sang takok nung tembangtsü merangdi.

Sarasadem

Kibuba Yisu nai iba lima nung nungloktsüba wadang takok nung tembanga ama, nia takok nung ne tenyaba wadang takok nung tembangtsü ni yariangma. Amen

Swiss MP-i Algeria nung Tenla kitem shibangtsü anema jembi

April 01, 2021: March ita Yaküm International nung Swiss National Councilor, Christian Concern (ICC) leniba Eric Nussbaumer-i Swiss nung tentet 21-i shidi ka ajanga Federal Council dang Algeria Tir, Abdelmadjid linük nung Protestant Arogotem Tebboune dang linük nung Tenla kitem shibangtsüba ya tamangba yimsü ajak sadoka amangtsü temeden anema lir, ta metetdakja liasü, ta 2019 küm December ita International Christian Concern osang ajanga metetdaksü.

Nussbaumer-isa, 2017 küm November ita nungi tenzüka tang tashi nung Algeria nung Protestant Arogo Tenla ki 17 shibangtsüba ya Algeria nunger Khristantem temeden anema sorkari inyakba lir, ta metetdaksü.

Algeria nung tamangba yimsü temeden anema inyakba atema alima linüktemi aitsüba mapang nung Nussbaumer-i Federal Council nem iba osang metetdakja liasü.

Taküm February ita nung UN Human Rights Council-i yaküm parnoki Algeria sorkar dang shidi ka ajanga sorkari linük tesem ajungalen Khristan Arogo Tenla kitem shibangtsüba atema telangzüba aginer, ta mepishiba metetdakja liasü.


March ita Yaküm International nung Swiss National Councilor, Christian Concern (ICC) leniba Eric Nussbaumer-i Swiss nung tentet 21-i shidi ka ajanga Federal Council dang Algeria Tir, Abdelmadjid linük nung Protestant Arogotem Tebboune dang linük nung Tenla kitem shibangtsüba anema inyaktsü aser tanaben lapokdaksütsü atema mepishia liasü.

2019 küm December ita nung Tebboune-i Tir menden agizüka liasü. Pai linük nung temelenshi bener arutsütsü nangzük, ajisüaka linük nung tenla kitem shibangtsüba onük nung pai ola madokba agi Khristantem mepelar. Linük nung Muslim nunger tekülem kitembo (mosques) aika tanaben lapokdaksüogo.

2020 Annual Report nung U.S. Commission on International Religious Freedom (USCIRF)-i tamanga yimsü temeden anema inyakba linüktem- Special Watch List nung Algeria linük züngoka liasü.

Algeria nung Protestant Tenla kitem shibangtsüba dang masü saka sorkari Khristantem anema tsüngrem mezüngmeshiba ozüngtem benokogo.

OLONG PAITEP # 5770



TIPILEN		LANGTSÜNGLEN	
1. Taochi sayuba	- 10	1. Menungra	- 6
4. Temezüng agi kongshi	- 4	2. Mi tsükloker mesepba	- 4
5. Ainer	- 6	3. Sūngo o tzū ajemba	- 5
7. Chiyungnū	- 3	5. Temenemtsū tajung	- 7
8. Mi nung atsük	- 5	6. Idak	- 4
11. Asen masū	- 3	8. _ _ _ _ ok	- 4
13. Lenmang ajurutepdak	- 6	9. Tebangi apuba kongki tapu ka	- 6
14. Yangi masū	- 4	10. Tashi endokba metet	- 5
15. _ _ _ _ _ jang	- 6	12. Tzū manung senzūba	- 4

OLONG PAITEP # 5769 TELANGZÜBA

TIPILEN :	LANGTSÜNGLEN :
1. Rebeka, 4. Adam, 6. Yohan,	2. Kan, 3. IM, 5. Anüng, 7. Amsü,
9. Zü, 12. Sayutsüngir, 15. Ku,	8. Yosep, 10. Sara, 11. Isak, 13. Yakob,
16. Naman, 17. Abel, 18. Samuel.	14. Nana, 16. Noa, 17. Am.



ALOKBAI PAR TANÜR DANG 'ADDICT' TETEZÜ ASUNG DANGER :

Alokba : Hai tanürtem...Obala nunger mapang 'Nabong ana tongtep' tashi dang azüngji tawa-tanü nenok jembiba oshi kecha mangateter. Anungji nenok English oshi agi 'Addict' tasa jembiba tetezü ya kechi akaa ...???

Jala : Oba....Na anogo tepiyong 'Rum' agi longa oa meseper dang aliba....Iba amala dang ya 'Alcohol addict' ta ajar aja.

Jabaso : Ano ojala-a ki mapa kecha meinyaki anogo piyong T.V. nung Serial dang repranga kazüba....Iba amala dang ya 'Serial addict' ta ajar aja.

Warakla : Ayyyyaaaa...Tajungsang nenok amala dang ya 'Drug addict' ta ajar aja... Aser Narola nenok amai anogo tepiyong Phone mesukshia kazüba....Iba amala dang ya 'Video Games addict' tasa ajar adii...

Alokba : Waaooo...!!! Asen kinunger kata paki mali ajunga 'Addict'-a noo...!!!

Lilir : L.Kika Pongener.

TANÜBO NAI LANGZÜANG

Q. Teesta Ayong ya kilometer ____ talang lir?

A.315 kilometers

B.316 kilometers

C.318 kilometers

D.320 kilometers

===== (Taruba adok nung onoki langzütsü)

YASHI ADOK TELANGZÜBA : Twitter

AO OSHI ANGAZÜKDAK:

TANÜ ANGAZÜKTSÜBA OJANG

Amen¹

(v) Techimi ajendaker anisüngzükba (sit)

* Onok ajak menden nung amen.

Amen²

(v) Sūngjang mesūra chiyongtsü tachitsü meshia akūmba (ripen)

* Ozü tsüki nung sūngjanglijang ajak kenyongi amen.

Amen³

(v) Pei akok khu aben (load)

* Onok ajak pei amen khu oshir aben.



Tir Yimyim

NAI-A YA METETTER MA?

TAOBA MAPANG APRIL 02 NU ATALOKBA TONGTIBANG KAR:

- 1559 - England aser France tsüngda mezüngbuba Treaty of Le Cateau-Cambrésis tenangzüktep agi.
- 1745 - Austria aser Bavaria tsüngda yimjung atema sign asü.
- 1860 - Turin nung 1buba Italian Parliament amen.
- 1866 - US President Andrew Johnson-i Alabama, Arkansas, Florida, Georgia, Mississippi, Louisiana, North Carolina, South Carolina, Tennessee & Virginia nung civil war anentsü.
- 1912 - China nung Sun Yet Sen-i Guomindang Party tenzük.
- 1926 - Calcutta nung Muslims aser Hindus na tsüngda mangatetep adok.
- 1956 - Soap opera "As the World Turns" aser "Edge of Night" TV nung saya.
- 1968 - Beatles-i Python Music Ltd tentet.
- 1974 - 46th Academy Awards: "The Sting" atema Glenda Jackson aser Jack Lemmon nati award angu.
- 1978 - Oakland Coliseum Arena nung Czech tennis star Martina Navratilova-i 7-6, 6-4 agi Australia tsür Evonne Goolagong Cawley tsükdaktsüba sülen, lai mezüng WTA Tour Championship title takok angu.
- 2013 - UN General Assembly-i mezüng Arms Trade Treaty agizük.
- 2020 - Alima ajunga nung COVID-19 tashidak puteter nisung million ka dak tema - 1,002,159 aküm aser iba wara ajanga asür nisung 51,485 tashi atu.

SUDOKU # 5813

	8	1							4	3	5	8	9	7	6	2	1
	9	7		8	1				8	1	6	4	2	5	9	7	3
		6	7	9	3	1		4	2	7	9	6	3	1	5	8	4
9		5	6	2					1	5	2	9	4	3	7	6	8
6	4		1			8			9	8	3	5	7	6	1	4	2
					5	7	9	6	6	4	7	2	1	8	3	5	9
	2		8						3	6	8	1	5	4	2	9	7
	6	9					3	8	7	9	4	3	6	2	8	1	5
5					4			2	5	2	1	7	8	9	4	3	6

TELANGZÜBA # 5812

OJANG LUTEP # 5357

PETELA	:						
SÜRMEA	:						
MTETIM	:						
EIP	:						
ISATSHSÜI	:						
MBABILE	:						
GDAN	:						
UNGNİ	:						
ALTI	:						
URAJU	:						

OJANG LUTEP TELANGZÜBA # 5356

KARIBO TETSÜBU AGI TSÜKSHIR TSÜNGDANG PEI
KONANG AJAK ZÜNGA KAZÜR

TAN HOPTA ATEMA - KOMA SÜLA ?

Q. Asenoka tsūmartem amato yimtak dang septepa melii, jokshia jokshia asüyonga, alu nung dang lia alu ayim nunga koma süla ?

Olong 20 shi nung April 02, 2021 tashi nung iba telangzüba ya onok dangi (e-mail - tiryimyim@gmail.com) :
(SMS - 9856121232 / 9436072422) : (WhatsApp - 7005723372 / 8729995804) : (tiryimyim.in) ajanga yokang. Telangzübatemji taruba Honibarnü adoktsütsü.



April 1, 2021 nü West Bengal election shilem tanabuba agidang Bankura district nung aliba polling station ka nung vote agütsüsupurtem dak thermal screening agiba noksa nung angur.

Nandigram nung Trinamool Congress-i vote shilem 90 angutsü: Mamata

Nandigram (West Bengal), Rongchii/April 01

(Agencies): Brihostibarnü West Bengal chief minister, Mamata Banerjee-i, Election Commission (EC)-i state nung opposition party BJP yarir, ta ashiba den külemi, Trinamool Congress (TMC)-i tashishiba onük aika EC nem metetdaksüyonga EC-i kecha meinyaker, ta aitsü.

West Bengal nung assembly election tanabuba shilem agiba anogo nung Mamata-i Nandigram constituency nung polling station ka semdangba sülen osangbener den jembidang lai, "Nenoki (Election Commission) kechisa merangdir merangka BJP-i takok mangutsü. Nandigram nung TMC-i vote shilem 90 angutsü," ta ashi.

Nandigram nung voters aika nem vote magütsüdahtsü, ta metetdakja lai state Angh, Jagdeep Dhankar nem

tashishiba ken o metetdakja liasü.

Polling reprangtsü atema lai polling station ka semdangba sülen ghonda ana jungnüa raratepa liasü. Mamata polling booth telung nung lia BJP züngsemtemi 'Jai Shree Ram' ta ayimden.

Union Home Minister, Amit Shah aija Mamata-i, "Home Minister-i CRPF, BSF aser tanga sepaitem dang BJP purtem dang yaritsü tuyuogo. Election Commission-i ola madokba atema ni tatok meshir. Onoki shidi aika agütsüogo saka parnoki BJP candidate tem dang yarir," ta ashi.

Lai ashiba agi, polling booth atsünga agiba atema lai tashishiba onük 60 EC nem agütsüogo, saka EC-i kecha meinyaker.

Laisa, "Item nisung shingai Bengali oshi mejembir. Parnok ajakji tangalen nungi arurtem lir.

Parnok Bihar aser Uttar Pradesh nungi aru saka Central sepaitemi parnok kümzüka ayu," ta ashi.

Ano külen EC-i Nandigram kübok Boyal area nung rara adokba dak sendakba nung administration dang osang tejangja agüjang ta tuyuogo.

Mamata-i Nandigram menden nungi toktep aser kasa menden nung tokteper BJP candidate, Suwendu Adhikari-ia, Mamata-i ghonda ana jungnüa timtem agütsü, ta aitsü.

"Mamata-i timtem agütsüba ajanga ghonda ana jungnüa vote magütsü. Nandigram nung vote shilem 90 agütsüogo saka iba polling booth nungbo vote shilem 78 dang agütsü," ta pai ashi.

Constituency 30 nung election tanabuba shilem agiogo. State nung election shilem 8 lemsar agir aser April 29 nü tembangba sülen May 2 nü election osang sangdongtsü.

India nung ano nisung 72,330 dak covid putet aser 459 süogo

New Delhi, April 01

(Agencies): India nung tang anogo shia coronavirus tashidak timba-timba puteta arudar aser taküm küm tenzüker anogo ka kija nung iba tashidak timtiba putetbaji tesüiba ghonda 24 tsüngda liasü.

Tesüiba anogo ka tsüngda linük nung ano nisung 72,330 dak coronavirus putetogo aser iba tashidak agi nisung 459 süogo; tang tashi nung India nung coronavirus case ajak senteperbo 1,22,21,665 jungogo, ta Brihostibarnü Union Health Ministry data ajanga metetdaksü.

Tesüiba anogo 22 tashi anogo shia iba tashidak timba puteta arudar, aser tang linük nung iba tashidak agi teshirangdakpur 5,84,055 kümogo; ibaji coronavirus caseload nungi shilem 4.78 lir, ta kasa osang ajanga metetdaksü.

Tang tashi nung nisung 1,14,74,683 anepogo aser iba

tashidak agi shiranger anepba shilemji

93.89 lir, ta Ministry data nung lir.

Taküm February 12 nübo linük nung teshirangdakpur 1, 35,926 dang liasü saka tangbo teshirangdakpur 5,84,055 kümogo.

ICMR-i ashiba agi, March 31, 2021 tashi nung linük nung samples ajak agi 24,47,98,621 tendangogo aser iba nungji Bodhbarnü tendangba samples 11,25,681 densema lir.

Tesüiba anogo ka tsüngda iba tashidak agi asür 459 nungji Maharashtra nungi 227, Punjab nung 55, Chhattisgarh nung 39, Karnataka nung 26, Tamil Nadu nung 19, Kerala nung 15 Delhi nung 11 aser Uttar Pradesh nunga nisung 11 asüba densema lir.

Union Health ministry-i ashiba agi, iba tashidak agi asürtem shilem 70 dak temabo comorbidities ajanga asüba lir.



Thiruvananthapuram (Kerala), April 1, 2021: Kerala Assembly election dak sendakba nung Brihostibarnü Thiruvananthapuram nung aliba party office nung Congress lenir aser MP, Shashi Tharoor-i osangbenertem den jembiba noksa nung angur.

India-i Myanmar nung rara aitsür; lenirtem chioktsü akhanger

New Delhi, April 01

(Agencies): Tang Myanmar linük nung sepaitemi longkak aiterem dak tashiyim amshiba atema India-i aitsüba den külemi asürtem atema mangyimba lemsatep.

India-isa Myanmar nung sepaitemi longkak aiterem dak tashiyim amshiba azüoktsü aser pua aliba lenirtem chioktsü takhangba agütsü.

Bodhbarnü UN Security Council nung tang Myanmar tensa indang jembiba sülen India

nungi Permanent Representative to the UN Ambassador, T S Tirumurti-i twitter ajanga, "Senden nung item ya jembir: rara aitsü, asürtem atema mangyim, tazüokba alitsü mepishi, democratic inakyim atema inyaktsü bangjem, pua aliba lenirtem chioktsü ajungshi aser @ASEAN-i meranga inyakba mapatem pelaa agizük," ta metetdaksü.

Pai ashiba agi, senden nungsa iba tensa yimjung nung latettsü, nüburtemi imlaba ataloktsütsü

atema inyaktsü aser Rakhine state development programme atema teyari agütsütsü jembir.

Taoba hopta UN Secretary-General, Antonio Guterres-ia, Myanmar nung sepaitemi tanurtem densema nisung jenti tepsetbaji sashi sashia aitsür, ta metetdakja liasü.

Guterres-isa sepaitem dang tashiyim mamshitsü mepishiba den külemi tang Myanmar nung meimchir temeden anema inyakertem nem temerenshi agütsütsüla, ta metetdakja liasü.



New Delhi, April 01, 2021: Brihostibarnü New Delhi nung aliba Max Hospital nung coronavirus vaccine agütsü atema nisungtem atatepba noksa nung angur. India nung COVID-19 vaccination shilem tasembuba tenzüka arrshi küm 45 ser temapurtem nem vaccine agütsür.

Congress Party-i Karnataka nung President Rule benoktsü akhanger

Bengaluru, April 01

(Agencies): Tang Karnataka nung BS Yediyurappa-i aniba sorkar telung nung mangatettep adoka aliba maongka agia Brihostibarnü Karnataka nung opposition Congress-i state nung Tir yimsüsüba benoktsü takhangba agütsü.

Karnataka nung RDPR Minister, KS Eshwarappa-i odiodi-a chief minister Yediyurappa nem tai tongoktsüba atema Congress-i minister nem tenüngsang agütsüba den külemi state Angh, Vajubhai Vala dan state nung President Rule benoktsü takhangba agütsü.

Taoba mapang chief minister aser Congress lenir, Siddaramaiah-i, opposition-i Yediyurappa-i aniba sorkar nem tai tonglokttsüba sülen tang Minister Eshwarappa-ia kasaji tonglokttsür, ta ashi.

Siddaramaiah-i twitter ajanga, "Senior minister KS Eshwarappa-i tonglokttsüba taiji kanga tulu. Angh-i-tiyongtsüi aita inyaktsüla, sorkar anentsütsüla aser Tir yimsüsüba benoktsüla. Karnataka nung BJP-i

ochimashi inyakba, tejak repranga inyakba aser metokmeperi kulitem Eshwarappa-i metetdaksüogo. Tamalen nungi onoki iba ya jembia aruogo aser tangbo par party nungi minister temia kasaji jembir," ta metetdaksü.

Eshwarappa nem tenüngsang agüja Siddaramaiah-isa, yimtenren nung ajemokba sülen tang mezüng RDPR minister-i mapa tajung ka inyakogo; pai pa menden atema mebilemi state ajungtsü atema dang bilema inyakogo, ta ashi.

Tesülen Karnataka Congress Tir, DK Shivakumar-ia Eshwarappa nem tenüngsang agütsü. Shivakumar-isa Chief Minister, Yediyurappa-i menden nungi alutsüla mesüra RDPR minister anentsütsü atema inyaktsüla, ta ashi.

"Nai (CM) anentsüla mesüra RDPR minister anentsütsü atema inyaktsüla. Pa (Yediyurappa) atema tanga lenmang mali, kechiyong par minister temia pa dak melung melemeter," ta state Congress Tirisa metetdaksü.

Longkak aitba ken o nung Jimmy Lai aitsüogo



Democracy busema nokdaker Lee Cheuk-yan (tiyong), Hong Kong nung aliba court kati arudang placards ama aliba noksa nung angur. 2019 küm Hong Kong nung sorkar anema nüburtemi longkak aitba mapang ozüing alema lokti ayongzükba aser iba amala sentong nung shilem agiba mechi media tycoon Jimmy Lai aser democracy asoshi nokdaker nübu tejen, Martin Lee densema democracy asoshi nokdaker nisung tejangja tenet tashi aitsüogo.

Hong Kong, Rongchii/April 01 (Agencies): Küm ana tejakdang kanga sashia longkak aitba dak sendakba nung ozüing alema nüburtem adenshiba ken o nung Hong Kong indang democracy busema nokdaker tejangja nisung tenet aitsüogo.

Ozüing alema yimdong nung jajatsü sentong ayongzükba nung aibelena alirtem rongnung media tycoon Jimmy Lai aser yimten yimsüsür tejen Martin Lee dena lir.

Par tenet prongi aibelena mali ta nokdak, saka tangbo parnok tepuokdak ayutsü.

Yimtenren nung nokdaka alirtem reshikangshiba aija nisung telok tilaka court kima adenshia longkak aita liasü.

Tamalen activist anati kasa ken o nung aija küm pongu tashi tepuokdak ayutsü obendang agüja lir.

Par tenet nem temerenshi agütsütsü anogo melatet. Parnok kar anemabo danga ken o benoka lir, aser item rongnung Beijing-i benokba national security law dena lir, koba 2019 küm nüburtemi longkak aitba mechi benoka liasü.

Democracy busema kanga

sashia longkak aita aruba sülen Beijing-i Hong Kong nung temeden aika agientsü meranga inyaker.

Hopta tetenzüklen China-i Hong Kong indang electoral rules melenshitsü asoshi pangzüing ka renema liasü, aser ibaji ajanga parliament züingsem inyaksü temsüa alirtem ya mezüing Beijing busemba committee ajanga asadangtsü.

Lai aser Lee den taoba mapang ozüing yanglur Margaret Ng, Cyd Ho Sau-lan, Lee Cheuk-yan, Albert Ho Chun-yan aser Leung Kwok-hung, shiba dang "Long Hair" ta ajar, parnok ajak ken o nung aitsü.

Hong Kong nung sorkar anema longkak aitba agi sünga alidang 2019 küm August 12 aser 18 nung parnoki temelaba mali lokti adenshia longkak aitba nung shilem agi, ta tai tonglokja liasü.

Saka parnoki, lokti adenshitsü temeden ya Hong Kong indang constitution nung wazüka yuja lir aser ketdangsürtemi longkak aittsü mela saka iba sülen temelaba magie longkak aita liasü, ta ashir.

Hong Kong nung democracy

busemba lokti nungiter tejangja nisungtem rongnung Lai ya ka lir.

Lai ket nung rongsen aliba ya sen billion \$1 shi jenjang lir ta ashir, koba pai mezüingbo abensüoshi industry nungi benden aser meilongi media nung tetsüing ajemoka Next Digital ya tentet.

Next Digital ajanga Apple Daily menünger, koba nüburtemi kanga sabua azünger aser mapang shia iba osangkaket nung Hong Kong aser mainland China lenirtem anema zülur.

Arishi küm 82 tain Martin Lee ya Democratic Party indang founding chairman lir.

Pa dang Hong Kong democracy indang tebu ta ajar.

Leung Kwok-hung, shiba dang "Long Hair" ta ajar, pa ya yimti indang parliament, Legislative Council (LegCo) nung züingsem liasü aser mapang ka iba territory nung tematiba menden, Chief Executive atema toktepa liasü.

Margaret Ng ya Civic Party nung tejangja nübu ka lir, shibai LegCo nung küm aika tenzüka aruogo.

Myanmar nung longkak aitertemi constitution kakettem arong

Naypyitaw, Rongchii/April 01 (Agencies): Mitkartemi sorkar atsüingdoker ita ana lir Myanmar nung activist temi Brehostibarnü mitkartemi yangluba constitution indang copy tem rongdoka liasü.

Mitkartemi February 1 nü Aung San Suu Kyi'er sorkar atsüingdokba sülen Myanmar nung rongrong shirong tulu adoka lir, aser November election nung ashikülak mapa inyakba ajanga iba mera ya agi, ta mitkartemi nokdaker.

Suu Kyi aser lar National League for Democracy (NLD) lenirtem aika pua lir.

Mitkartemi ken o tilateri kar nung la ya aija lir, aser item rongnung ozüing alema bendang lima nungi walkie-talkie trok bener arua amshiba aser coronavirus protocol nung aibelenbatem lir.

Security forces temi mitkar anema nokdaker dak taochi mesayui azüdokshiba aser arrtsülen army aser ethnic minority telungpur tsüingta raraba tali akumba ya azüdokshi lenmang bushir ka dang lir, ta UN ajanga tekumandangtsü shia lir.

Mitkartemi tashiyim amshia sorkar atsüingdokba anema nüburtemi longkak ait tenzüker civilian 538 tashi tepsetogo aser item rongnung nisung 141 bo Honibarnü tepseta liasü, koba rongrongshirong tenzüker tamajungtiba anogo liasü, ta Assistance Association for Political Prisoners (AAPP) ajanga ashir. Brehostibarnüa tesem balala nung longkak aitba mapang nisung ana asü, ta osangtem ajanga ashir.

Monywa jila nung security forces temi injang khaloktsüba

mapang nisung ka asü aser pongu yiru, ta Monywa Gazette ajanga ashir. Security forces temisa Mandalay yimti nunga injang khalokja nisung ka khaset, ta ashir.

Kachin Independence Army (KIA) den raraba mapang sepai 20 takum samaogo aser mitkar indang gari pezü raksatsüogo, ta DVB osang ajanga ashir. Kachin Independence Army ya Myanmar nung sorkar anemba teloktem rongnung tashi tulutiba ka lir.

Küm 20 dak tema lir tang mezüingbuba süa, Myanmar mitkartem indang tayimtsü amshia ano Karen National Union (KNU) alidak bomb pokloktsür aser yimtsüingtem nung alir nisung meyrirjang aika pei kidang nungi jena ogo, aser aika Thailand leni jena aor.

Navalny-i tepuokdak lumia longkak aiter

Moscow, Rongchii/April 01 (Agencies): Russia indang prison service ajanga Alexei Navalny anepaluba atema bukuma nokdaker, aser Kremlin anemsangi tepuokdak pai nüngdakba ama temang anepalu masür aser junga memejangteter, ta ashishiba magizük.

Tir Vladimir Putin anemer tejangja, Navalny ya timi temang anepaludaksütsü nükjidong nung Bodhbarnü nungi tenzüka lumia longkak ait tenzükogo, shibai teberem aser tetsüing nung timtem lir, ta ashir.

Opposition politician yagi, tanükertemi ghonda shia pa sakdaksür aser pa temang anepalutsü mepishiba magizüker, ta taoba hopta shia liasü. Anüolen linüktemi pa chioktsü akhanger.

Vladimir region nung pa yua aliba IK-2 facility nung prison service ajanga osangbener dang ashiba agi, Navalny amshiyim ya ozüing agi melaba ama lir aser dangara kasa yimya nung amshir.

"Correction facility ketdangsürtemi tepuokdak alir temeden nung mekongshie ghonda ti meinprong mesüi mejangdaksür. Aser

tanükertemi aonung tepuokdak tesem sema repranga senzütsü nüngdaker," ta parnoki Bodhbarnü menur ashi.

"Item inyakyim agi tepuokdak alir anisüngzükba nung mekongshir. Navalny nem tang pa temang den apet medical care agütsür," ta ashi.

Pa puoka aliba tsüingden chiokdak indang governor dangi teka agi shidi ka züluba nung, pa temang tendangtsü asoshi pai aginüba ama doctor meshiba aser tim mozü asüingdangba magütsür, ta Navalny-i ashi, koba par teloki social media nung Bodhbarnü prokshia liasü.

Navalny indang okatsürtemi küdang Navalny temang anepalutsü ashi aser parnoki prison service dang tsüingden chiokdaki ni aotsü mesüra Navalny ya clinic kati yoktsü temelaba meshiogo ta ashi, ta doctor Alexei Barinov-i osangbener dang ashi.

"FSIN (prison service) nung telemtetba agiba atar aser ni aotsü renema lir," ta pai ashi.

Arishi küm 44 tain yimten yimsüsür, Navalny ya junga anepalutsüla, ta medical professional temi Deobarnü shidi ka zülua liasü.

Ethiopia nung telungpuri civilian 30 shi tepset

Addis Ababa, Rongchii/April 01 (Agencies): Ethiopia kübok Oromia region nung prangbong bena alirtemi yimtsüing ka amakba mapang civilian 30 tepset, ta kuli alirtemi Bodhbarnü ashi.

Arishi küm 50 tain aluyimer Wossen Andaege-i ashiba agi, Oromia nung kübok West Wollega Zone nung Mongulbar aonung amakdak par kidangeria asü. Par kidanger asür ya ethnic Amharas lir, ta pai ashi.

"Gari ka nung nisung tasü mang 30 bener oa arem," ta pai osangbener dang phone ajanga ashir. Pai ashiba agi, par kinungertemi injang ola angashiba sülen parnok ya anasa aliba government office kati jena oa sepaitem aru ata yangji atsüka liasü.

Lendong atalokba Babo-Gembel district nung alir kati ashiba agi, prangbong bena alirtem ya aonung 9:00 ako nung aru aser yimdaklirtem kima telok ka kuma adenshidaksü aser khaset.

"Iba mapang lendong atalokba tesem nung sorkar meyong sepaitem meliasü. Tesem ka nung nisung taü mang 29 liasü aser ano temeket nunga tasü mang kar liasü," ta Orthodox arogo ka nung tanüker kati ashi.

Yangji aliba ketdangsürtemi iba lendong atalokba asoshi Oromo Liberation Front (OLF) nungi jakzüka aoba OLF Shane mesüra Oromo Liberation Army ta ajaba telok ka tenüing

asener, kong nisung 15 yirua liasü.

OLF ya opposition telok ka lir, shirnok küm aiba danga linük nung jenoka ali saka 2018 küm Ethiopia Ato Kilonser Abiy Ahmed yimsüsüba aruba sülen nokdanga aliba agien.

"Sorkar den nüburtemi ozüing amshitsü mechi mera balala agiba ajanga OLA tashi ajema kumaka parnoki teimla maliba ajanga civilian dak amaker," ta Oromia regional government ajanga sangdong ka nung ashi.

Oromo ya Ethiopia nung ethnic telok tulutiba lir aser Amhara ya tanabuba nung lir. Amhara aser Oromia region tsüingta arrtsü lir.


March ita Oromo Liberation Army ajanga tetsür aser tanurtem densema Amharas nisung 300 dak tema tepsetogo, ta Washington, DC nung amenoka aliba Amhara Association of America nung mendenpuba, Tewodrose Tirfe-i ashi.

Ajisüaka sorkar ola madoker, ta pai aitsü.

OLF Shane ajanga Oromos nunger temeden asoshi rarar ta ashir aser iba telok indang odongtar Odaa Tarbii-i lendong agütsüba ya par telok mapa masü, ta shiogo.

"Onok dak tai tongloktsüba ya tiazü lir aser sorkari mapang talangka nungi Oromo Liberation Army ya ozüing maliba telok ka ta aitsünüa aruba nung shilem ka lir," ta pai ashi.

ATMA Mokokchung-i sentong ka ayongzük



Dimapur, Rongchii/April 01, 2021 (TYO): Ongpangkong north block kübok Longsa yimdak Brehostibarnü (01.04.2021) ATMA Mokokchung ajanga "Sustainable Agriculture & Allied Farming Approaches" nung anogo ka 'aluyimer - scientist' sensaksem sentong ayonga agiogo, ta sangdong ajanga metetdaksü.

Iba sentong nung Nuksunginla Jamir, ATM, ATMA menden liasü aser Dr.Lanunochetla, Dy. District Agriculture Officer, Mokokchung, Dr.Keivetsu Khate, Senior Scientist & Head, KVK, Yisemyong, Shri.Renbomo Ngullie, ACTO(Horti), KVK, Yisemyong, Shri. Samuel

Sangtam, ACTO(Agronomy) KVK Yisemyong, Dr. Rongsensusang, ACTO(Vety& A.H),KVK, Dr.Sanen, VS,A.H & Vety.Services, Mkg, Shri.Recha Imchen, Horticulture Inspector, Mkg aser Shri.P. Sakotsungba Longchar, ATM, ATMA, Mkg. nung shisalen sayur ama sentong nung shilem agiogo.

Iba sensaksem sentong ya sector asem - Agriculture, Horticulture aser Veterinary onük nung ajemdaker agi. Horticulture aser Agriculture sector kübok metsük-mesen aser tsünusenbongtsü dak tashidak alaba onük balala nung sensaksem, kong aluyimertem dang metsüjang tajung amhiba aser ali den apet tsünusenbongtsü yokba indang

tongtibangtem metetdakja liasü. Ano külen, veterinary sector kübok ak (pig) metsüba indang tongtibangtem nung sensaksemogo, kong ak metsüh tajung shima anepaluba, ak tetsü o tebong den ak chanu anepalua mesüba aser tashidak/ wara balala nungi ak kümzüka yutsütsü indang telok dang metetdaksü.

Aluyimertem timba ajangzüksü atema, alu ka nung tsünusenbongtsü tapu ana (sequential cropping) yokba indang tesayuba agütsüogo. Iba den külemi, integrated farming system nung technology balala amshiba aser farm atema maparen metenzükdang asalentong tajung yanglutsü indang telok dang rasa ashi.

Iba sensaksem sentong nung aluyimer 24 agi shilem agiogo.

Security Forces-i, NSCN (KN) züngsem ana aser temesepba mozü ayoker ka apu

Dimapur, Rongchii/April 01, 2021 (TYO): Police den longjemer Security Forces-i, March 28 nü NSCN (KN) züngsem ana aser temesepba mozü ayoker ka Kiphire District kübok Tethyo Junction nung puogo.

Osang tejangja angazükba

sülen Security Forces aser State Police na longjemer meita aoba mapang NSCN (KN) züngsem ana aser temesepba mozü ayoker ka Kiphire District kübok Tethyo Junction nung apu aser parnok ket nungi Heroin gm 12 (sen Lakh 1.2 shi alang), Buprenorphine Tablets 20,

Mobile phone ana, Motorcycle Bajaj Pulsar ka aser Myanmar Kyat (sen) 1000 nguteta liasü.

Aija alirtem aser parnok ket nungi apuba osettem ajak maneni bushitsüngdangtsü atema Pungro Police Station, Kiphire nem bendanga agütsüogo.

Xiaomi-i 'Mi Mix Fold' sangdongogo



New Delhi, Rongchii/April 01, 2021 (Agencies): China indang smartphone yangluba company Xiaomi-i brand indang mezüing foldable smartphone - Mi Mix Fold sangdongogo. Iba Mi Mix Fold ya Samsung Galaxy ama Fold design den phone tema nung screen tilaka aser telung nung foldable screen tuluba alitsü.

Screen telungba nung 8.01-inch 4:3 OLED display den 2,480×1,860 resolution, standard display brightness 600 nits, Dolby Vision HDR aser tanga feature aika angutsü. Tema screen tasazük inch 6.52 lir aser 90Hz refresh rate angutsü. Company-i ashiba agi, Mi Mix Fold indang hinge ya 200,000ben tashi kulepteter.

Mi Mix Fold nung Harman Kardon-tuned speaker pezü

inokja lir, koba Xiaomi-i 3D panoramic sound agütsür ta ashi. Taoba mapang metetdaksüba ama, Mi Mix Fold camera nung liquid lens angutsü, koba Smartphone rongnung iba feature mezüing alitsü.

Iba smartphone 12GB RAM + 256GB storage variant jenjang CNY 9,999 (sen 1,11,800) aser 16GB RAM + 512GB storage

variant jenjang CNY 12,999 (sen 1,45,000) asütsü.

Specification tsütsü reprangdangra, Mi Mix Fold nung Qualcomm Snapdragon 888 processor den 16GB RAM aser 512GB internal storage angutsü. Phone indang battery tasazük 5,020mAh alitsü aser 67W fast charging support asür.

Xiaomi-i ashiba agi, minute 37 nung Mi Mix Fold battery sünga charge asür. Iba smartphone tesülen triple camera setup ka angutsü, kong liquid lens dena lir. Iba len ajanga 3cm - close focusing distance aser optical zoom - 3x den hybrid zoom 30x tashi telephoto lens atema nungitter.

Liquid lens dak alaka, iba phone nung primary 108-megapixel Samsung HMX sensor aser 13-megapixel ultra-wide-angle lens angutsü.

METONGSHITSÜR

Tir Yimym adok March 30, 2021 tapak 3 nung " Ao Musical Revival Tayonger Langpang Nungi" ta ser Bendang, Dimapur-i Copyright nung aibelenba taidok meshiba nung jangjashitsü dang, " AMR II nung tongtibang süa kentener Bendang Imchen-i anir Dimapur nung bendang tenüing alir tetsür tebur ajak tenüing menüksüogo," ta aliba olenji tazünger aikati mashileni angateta agir ama angazüker, anungji copyright nung aibelensang jagi Bendang Imchen densema Dimapur nung Bendang ta tenüing jaa alir tetsür tebur ajak tenüing menüksüogo ta angateta azüngtsü mepishir.

- Talitemjen Imchen

TENÜNGSANG AGÜTSÜR



Rev. Dr. Mar Pongener

Tenzüker Wb. Rev. Dr. Mar Pongener, Longjang Senso tajung, mera keta tenzüka wadang balala Tsüngremer tashi nung takok ngua arur külen, pa nübu mapa aser shisatsü tajung ajiteta Executive Secretary 'Ao Baptist Arogo Mungdang' (ABAM) nung shimteta asoshi Tsüngrem tenüing sanga aser pelaseta pa nem konang nüngsang tulu agütsür.

Tarutsü ne wadang ajak nung lokti anitsü shisatsü aser taküm tajung maneni moajangma ta onok tamang sarasadem.

"...tetsübu, kechiyong ni na alangzük; ni ne tenüing teta aja, na kü meyong lir" Isaia 43:1

Sd/-

1. Longjang Medemsanger Putu Menden
2. Longjang Baptist Arogo
3. Longjang Laishir Telongjem
4. Longjang Kaketshir Telongjem
5. Yimsen Youth Club Longjang

TEPELA TASOBA 89 BUBA ANOGO



K. Tongpang Ao

Tanü K. Tongpangnuktang (Longkhum) arishi küm 89 abensar. Lanuwa laja menja taküm ka nungi tenzüka tanü tashi Tsüngremer taochi aser temoatsü nung anir aruogo. Senzü-senpong tang gari lendong kenüa majuru aser shilu shira tashitak agi metongi anema yutsü ya asoshi Tsüngrem tenüing asanger.

Onok akümdong küm 90 masü küm 100 bena pa arishia tonjangma aji ozü sarasadem.

Temeim Kinungtsü, Chirnur aser Semchirtem.



Mokokchung, **Rongchii/April 01, 2021:** Mongolbarnü, DC Chamber, Mokokchung nung District Water & Sanitation Mission, Mokokchung District indang mezüing senden agiba mapang tangokba noksa ka yangi angur.

Kevilekho Zumvu-i 18buba Nagaland State Chess Championship kokogo



Kohima, Rongchii/April 01, 2021 (TYO): Nagaland Chess Association ajanga ayongba 18th Nagaland State Chess Championship Brehostibarnü (01.04.2021) tembangogo. Iba asayamung open category nung Kevilekho Zumvu-i takok nguogo, ta sangdong ajanga metetdaksü.

Kasa Championship Under-18 aser Under-14 category nung Mezivolu Veswu aser Jitihto Nyekha nati temaba jenjang ajangzukteta liasü.

March 29, 2021 nü nungi The Heritage nung tenzükba championship indang final osang yamai alitsü:

* Under 14: 1st - Westside School Dimapur nungi Jitihto Nyekha sen 10,000 & Trophy, Runners-up: Coraggio School Kohima nungi Pulonito Hesso sen 7000 & Trophy, 2nd Runner-up : St. Mary Cathedral Higher Secondary School, Kohima nungi Shurhozhahie Sabastian Solo sen. 5000 & Trophy; 4th - Minister's Hill Baptist Hr. School Kohima nungi Kereilhulie Nagi sen. 3000 aser 5th - Hope Academy School Dimapur nungi Manas Sharma

sen 2000.

Under-18: 1st - Westside School Dimapur nungi Muzivolu Veswu sen 10,000 & Trophy; 2nd - Coraggio School Kohima nungi Kunvuto Awomi sen 7000 den Trophy; 3rd - Holy Family School Kohima nungi Mughakishe Awomi sen 5000 den Trophy; 4th - Holy Family School Kohima nungi Intovi Awomi sen 3000 aser 5th - Holy Family School. Kohima nungi Kaboto Awomi sen 2000.

Open Category: 1st Kevilekho Zumvu-i sen 50,000 den Trophy; 2nd Mughaho Awomi-i sen 30,000 + Trophy; 3rd Khrielie Sano-i sen 20,000 + Trophy; 4th Seyiekhrietuo Mere-i sen 10,000 angu. Kasa mapang, jenjang 5th nungi 10th tashi nung Salhuto Nyekha, Akhrietuo Keseyie, Hekugha Yephthomi, Toivi Yephtho, Pikuto Chishi aser Ketholelie Nisa nungeri senpet sen 5,000 (meyi pungongo) agizükogo.

Tanga award rongnung:
Best Female Player - Coraggio School, Kohima nungi Shenikali Hesso-i sen 5000
Best 60 years & above: Sedi Nagi sen 5000
Only Female Player in Open

Category: Tsesam sen 2000

Nagaland Minister for Planning & Cooperation, Land Revenue and Parliamentary Affairs, Neiba Kronu, shiba NCA indang president lir, pai takok angurtem nem sempet agüja liasü.

Maneni, kasa sangdong ajanga angazükba agi, kümsük tanabuba atema Nagaland Minister for Planning & Cooperation, Land Revenue and Parliamentary Affairs, Neiba Kronu-i Nagaland Chess Association (NCA) indang president ama maneni inyaktsü.

18th Nagaland State Chess Championship tatembangbuba anogo nung kümsük 2021-24 atema Kronu den külemi inyaktsü ketdangpurtem shimogo. Helie Rüpreo-i aniba selection committee ajanga item ketdangpur tenüng sangdonga liasü.

Tanga ketdangpur temji Vice- Presidents - Pele Khezhe aser Toikhu Awomi; General Secretary - Mughaho Awomi, Joint Secretaries - Vekukho Soho, Ropfuville Nagi & Bovito Yeputho aser Treasurer - Kiyaseli Mere den Advisor K. Sekhamo alitsü.

Dr. T. Ao Trophy indang Fixture sayaogo

Kohima, Rongchii/April 01, 2021 (TYO): Brehostibarnü Hotel Vivor, Kohima nung, aruya aliba 21st Inter District Football Championship 2021 (Dr. T. Ao Trophy) atema fixture sangdongogo.

Iba championship asayamung April 12 nungi 19, 2021 tashi Indira Gandhi Stadium Kohima nung asayatsü. Dr. T. Ao Trophy ya Youth Resources & Sports, Nagaland den Nagaland Football Association (NFA) longjemer ayongzüksü.

NFA president K. Neibou Sekhose, Directorate of Youth Resources & Sports (DYRS) joint director Teisobou Sekhose, DYRS technical committee member William Koso aser osangbener matsündang iba fixture sayaa liasü.

Iba championship ya group pezü nung lemsar league den knock out system asayatsü

Group A nung Phek, Peren aser Tuensang dena lir. Group B - Zunheboto, Noklak aser Kiphire. Group C - Dimapur, Mon aser Wokha. Group D - Kohima, Mokokchung aser Longleng alitsü.

April 13 nungi 15 tashi League system nung anogoshia match pezüzü asayatsü.

Quarter final April 16 aser semi final April 17 nü asayatsü. Iba sülen semi-final takok angur team ana tsüngda April 19 nü final asayatsü.

Takok angur team nem senpet sen lakh 3 aser runner-up nem senpet sen lakh 2 agütsütsü.

Semi-final nung tamakok angur team anaprongla nem senpet sen 50,000 (meyi tenemnem) agütsütsü renema lir.

NFA-i, IG Stadium ya "Plastic free zone" ama sangdonger, ta metetdaksü.

NFA-i ashiba agi, COVID-19 temzüng talisa teka sanitise

asüba, mask inokba, physical distancing densema ajaki SOP nung metsüngareta anidaksüla.

Iba asayamung dak sendakba nung, Nagaland nung alirtem dang pei district tenüng nungi shilem agitsü asoshi melatsü. Pei pei district nung Deputy Commissioner ajanga agizükba Certificate tem dang iba asayamung nung shilem agitsü, ta NFA-i metetdaksü.

Pei district nungi asayatsü asoshi asayatem meshimra, pa telidak aliba district tenüng nungi asayatetsü akok aser iba district nung paji küm ana tashi alir nübu ka asütsüla.

Police kar danga pei Battalion tanga district nung lira, parnokia pei mapa inyakba tesem (district) tenüng nungi asayatetsü.

Asayar kar dak sendakba nung mangatetep lira, team-i parnok asayatem atema tejangja kuli agütsütsüla, ta sangdong ajanga metetdaksü.

Miami Open: Osaka quarter nung tsükogo

Miami, Rongchii/April 01, 2021 (Agencies): Bodhbarnü, Miami Open tetsür kija quarter final asaya nung, Greek tsür Maria Sakkari-i 6-0, 6-4 agi taoba mapang US aser Australian Open champion Naomi Osaka tsükdaksüogo.

Iba asaya tamakok ngua Japan tsür Osaka-i asaya 23 tashi atonga takok angutsü teimla ajunga raksadok.

Grand Slam pezüben tashi takok angur World no. 2 Osaka, shibai mezüing Miami Open takok marok angutsü asoshi meranga asaya liasü, quarter final asaya mezüing set nung lai point 8 dang angu.

Tanabuba set nung Sakkari-i Osaka ajateta masayadang, lai (Osaka) break point ka angu aser point 3-0 agi tejakdang aküm.

Sakkari-i 5-4 advantage angutsüsa 40-0 nungi asayaba sülen, lai tanaben Osaka ajateta liasü aser lai yokba serve ka Osaka-i baseline adena zükloktsüba sülen iba asaya koktet.

"Taküm tashi nung lai asaya timba takok ngua lir aser taruba

asayamung nunga lai junga asayatetsü. Tanü iba takok ya ni atema tuluka alitsü," ta asaya temer sülen Sakkari-i ashi.

"Ni yokba serve ajak junga asadanga liasü. Yimya balala meyoktepa asayatsüsa aküm. Iba asaya kanga tasak liasü," ta lai ashi.

Seed 23 Sakkari-i Canada tsür seed 8 Bianca Andreescu den semi final asayatsü. Tetsür kija quarter final asaya tanga ka nung Bianca-i 6-4, 3-6, 6-3 agi Spain tsür Sara Sorribes Tormo koka Semi final tongtetogo.

2020 küm February ita Fed Cup asayamung nungi Osaka-i love nung set ka danga tamakok mengui aruogo.

But Sakkari had to battle back to overcome Osaka's fightback.

"Atangji nunga, iba asaya tanabuba set indang mezüing game ana nung ni tera timtema asayaogo. Break point ana agitsü maongka angu, saka aji magitet aser service game mejungi asaya, koba mapang shia ataloker," ta Sakkari-i shisem.

AB de Villiers o Kholi na Chennai tonga aruogo

Chennai, Rongchii/April 01, 2021 (Agencies): Indian Premier League (IPL) asayamung tenzüksü aliba tejakdang Chennai yimti kübok star batsman AB de Villiers-i team bubble nung denogo, ta Brehostibarnü Royal Challengers Bangalore (RCB)-i metetdaksü.

Twitter sabang ajanga, RCB-i de Villiers indang noksa ka den "BREAKING THE INTERNET. Spaceship tonga aruogo! Chennai kübok AB de Villiers-i team bubble nung denogo," ta olen lemsatop.

Kasa anogo, India aser Royal Challengers Bangalore captain Virat Kohli-a RCB squad nung adentsü atema Chennai tonga aruogo. Squad nung madandang Kholi anogo tenet atema quarantine asütsü.

April 09, 2021 nungi tenzüksü aliba IPL asayamung atema, Mongolbarnü nungi RCB pur training camp tenzükogo.

"Captain Virat Kohli Chennai tonga aruogo," ta twitter ajanga Kholi mask inoker aliba noksa ka den iba olen lemsatop.

Sangdong ajanga angazükba agi, England den

ODI series atema Pune nung renemba bio bubble toktsüba osang Kholi-i jangjatsüogo aser Chennai tonga arur sülen IPL atema BCCI indang standard operating procedures (SOPs) agi melaba ama anogo tenet atema pa quarantine asütsü.

"April 01, 2021 nü Chennai nung Kohli-i RCB indang camp nung adentsü aser anogo tenet atema quarantine asütsü," ta sangdong nung shia lir.

IPL 2021 atema BCCI indang SOPs nung renema aliba ama, asayar ajak (India-England series nung shilem agir dak alak), support staff aser management tem shirnok bubble telungi aiter, parnok ajak pei pei tata hotel nung anogo tenet quarantine asütsü nüngdaker. Anogo tenet quarantine asüba mapang, parnok ajak Covid-19 atema tendangtsü aser negative osang tejangja aru nungang parnok pei pei takdang nungi adoka aser training den practice sessions atema melatsü.

April 09, 2021 nü Chennai nung RCB-i Mumbai Indians den asayatsü terenemba lir.

BILEMDANGANG

"Bilembaji asangsang nung mapa küma inyaktsü atema lir."